

Katechismus

Katechismus - VII

Rurer, Johann

Vorwort

Wieder einmal ging ein Jahr vorüber, und wir befinden uns am Ende des Jahres 2020 – Zeit, einige Bücher noch aufzuarbeiten, die ich Euch anbieten möchte.

Dieses Jahr hat uns allen eine Menge abverlangt – doch Gott hat uns hindurchgetragen.

Für mich persönlich bot die Zeit, die ich gewonnen habe, die Gelegenheit, einige neue Bücher zu erstellen. Gleichzeitig überarbeite ich viele der alten Bücher, sei es, um Fehler zu beheben oder neue Inhalte hinzuzufügen. Zunächst möchte ich die bestehenden Autorenbücher bearbeiten, danach sollen dann die Bücher zum Kirchenjahr, die Andachtsbücher und 1-2 neue Reihen aktualisiert werden.

Vielleicht hat aber auch der eine oder die andere Lust, mitzumachen und neue Bücher zu erstellen – spricht mich einfach an.

Euch allen wünsche ich Gottes reichen Segen und dass Ihr für Euch interessante Texte hier findet. Für Anregungen bin ich immer dankbar.

Gruß & Segen,

Andreas

Katechismus

1528

Catechismus, Das ist Vnterricht zum Christlichen Glauben wie man die jugent leren vnd ziehen sol, in frag weyß vnd antwort gestellt. Item, Etliche Christliche Collecten oder gebet für gemeynes anligen der Christenheyt. Nuremberg 1528.

Frag. Was bist du?

Antwort. Ich byn ein Christen mensch vnd eyn kindt Gottes.

Frag. Wo her wayst du das?

Antwort. Aus dem wayß ichs/ das ich dem wort Gottes glaub/ vnd auch getaufft bin in dem namen Christi.

Frag. Was glaubst du?

Antwort. Ich glaub in Gott vater almechtigen/ schöpffer hymels vnd der erden/ Vnd in Jesum Christum seinen eynigen sun vnsern herrn/ der empfangen ist von dem heyligen geyst/ Geporen aus der junckfrawen Maria/ gelitten vnter Pontio Pilato/ gecreuziget gestorben vnd begraben. Abstig zu der hell am dritten tag wider auff stund von den todten. Auffur gehn hymel/ sitzt zu der rechten Gots des almechtigen vaters von dannen er künfftig ist zurichten die lebendigen vnd die todten. Ich glaub in den heyligen geyst/ ein heylige Christliche kirchen/ gemeinschaft der heyligen/ vergebung der sünd/ auferstehung des fleyschs/ vnd ein ewigs leben.

Von den Artickeln des Christlichen Glaubens.

Frag. Was versteestu bey solcher bekandtnus deynes glaubens/ vnd was hayst/ Ich glaub in Got vater almechtigen/ schöpffer hymels vnd der erden?

Antwort. Es hayßt/ Ich setze meynes hertzen vertrauen vnd zuuersicht allein in den almechtigen/ lebendigen Got/ der aller ding mechtig ist/ der aller glaubigen vater ist/ der hymel vnd erden erschaffen hat/ erhelt vnd regiert. Ich verlaß mich mit meinem hertzen auff kein creatur/ werck noch verdienst got der herr ist allein mein hilf/ trost vnd seligkeit.

Frag. Was hayst dann/ Ich glaub in Jesum Christ seinen eynigen son?

Antwort. Es haist/ Ich verlaß mich auch mit gantzem hertzen/ auff den eynigen ewigen natürlichen son gots/ der des vaters weißheit vnd wort ist/ durch den der vater alle ding erschaffen hat vnd gubernirt/ der mit dem vater eyns/ vnd gleycher Got vnd herr ist.

Frag. Was haist dann dz nachfolgig/ der empfangen ist von dem heiligen geist/ Geporen auß Maria der junckfrauen?

Antwort. Ich glaub das der selbig vnser Herr Jesus Christus nicht aus fleisch vnd blut empfangen sey/ wie die Adams kinder/ sonder aus dem heiligen geist/ wie durch den engel Gabriel Marie zuuor versprochen war vnd im glauben desselbigen worts/ vnd der verheissung Gottes/ ward sie schwanger/ gepar vnsern Messiam vnd heiland reine junckfraw/ aus der almechtigen krafft Gottes himlischen vaters on zuthun aller menschen.

Frag. Was ist dan das man spricht Geliten gestorben vnd begraben?

Antwort. Wir weren all zumal ewiglich verloren/ Wo Christus nit für vns gestorben wer. Er ist von vnserwegen mensch worden/ für vns hat er geliten/ für vnser sünd ist er gestorben/ vnser schuld hat er bezalt/ vnd mit seinem todt vns erlöst von dem ewigen todt/ Ist vor vnserwegen in die hell gestigen hat geliten vnd empfunden die schmerzen des todts/ ist begraben als ein todter/ alles vns zu gut.

Frag. Was haist/ Er ist widerumb erstanden am dritten tag?

Antwort. Er hat den todt gewaltiglich aus eygner götlicher krafft vberwunden/ vnd beweist mit seiner herrlichen aufferstehung/ das er ein herr sey des lebens vnd des todts vnd warer son Gottes.

Frag. Was versteest bey dem artikel. Er ist auffgefahren gehn himel/ sitzt zu der rechten got des almechtigen vaters?

Antwort. Er hat mit diser seiner auffart der welt offenbaret sein herliche gotheit/ das er gwaltig sey imm himel vnd auf erden/ alle ding vnterworfen nit minder sey denn der vater/ gleicher ehren glori herlickeit/ gewalt vnd macht/ denn das hayst zur gerechten Gottes sitze.

Frag. Was hayst/ Von dannen er zukünfftig ist rc.

Antwort. Eben der Christus in was herlickeit er hinauf ist gefahren/ vnd sitzt in gleichem gewalt vnd regiment mit seinem hymlischen vater/ also auch

wirt er widerumb erscheinen am end der welt/ zu richten lebendig und todt/
glaubig vnd vnghaubig/ Hayden vnd Juden/ vnd alle völcker der erden.

Frag. Was hayst/ Ich glaub in heyligen geyst

Antwort. Es hayst/ Ich glaub vnd verlaß mich auff den heyligen geyst/ der
Gottes krafft ist/ vnd mit dem vatter vnd sun ein Got/ der vns erleucht/ tröst/
leret vnd sterckt/ das ist/ der Gottes wort vnd werck in vns lebendig vnd
krefftig macht/ der vns in trübsal/ not vnd angst beywonet vnd tröstet.

Frag. Wz haist die Christliche Kirchen vnd gemeinschaft der heyligen?

Antwort. Ich glaub/ dz der selbig geyst Gottes alle außewelte kinder Gottes
in einen glauben vnd gemein/ durch die predig des wort gottes habe bracht/
vnd die selbigen kinder Gottes heyssen die Christlich kirch/ deren grundt
vnd fundament ist Christus mit seinem wort/ die sind ein lebendiger tempel
Gottes/ in denen der herr selbs wonet/ vnd ist jr vater/ herr/ breutigam vnd
haupt/ darumb sie gemeinschaft haben an allen seinen gütern/ sind seine
erben vnd miterben Christi/ darumb sie heyssen gemeynschaft der heyligen/
das alle güter gottes/ inen nach gottes zusagungen gemein sind.

Frag. Was hayst ablaß der sünde?

Antwort. Es hayst/ das wir alle durch Jesum Christum/ so wir an jn glauben/
vergebung vnser sünd haben/ welcher ablaß vns durch Euangelium verhayssen
vnd verkündet wirt/ vnd kumpt nicht aus gelt oder vnserm verdienst/
sonder aus gnaden vnd barmhertzigkeit Gottes in Christo vns versprochen.
Darumb wer mit festem glauben dem Euangelio anhangt/ der hat verggebung
aller seiner sünd.

Frag. Was hayst aufferstehung des fleyschs?

Antwort. Ich glaub/ das ich eben mit dem leyb/ den ich hie trag der yetz
sterblich ist/ am Jüngsten tag wer widerumb erweckt durch Gottes stymm/
wie Christus zuuor erstanden ist von toden.

Frag. Was ist denn/ vnd ein ewigs leben?

Antwort. Ich glaub vnd wayß aus götlicher gschrift das nach disem elenden
vergencklichen leben/ ist ein herliches/ seliges/ ewiges leben/ welches alle
glaubigen vnd außewelten Gottes mit Christo werden seligklich besitzen in
ewigkeit.

Von den zehen Gepoten

Frag. Was soll eyn glaubiger mensch thun?

Antwort. Er sol recht thun/ vnd das vnrecht lassen.

Frag. Was ist dann recht vnd vnrecht?

Antwort. Recht ist/ was Got recht vnd gut heyst/ aber vnrecht vnd sünd ist/ was Got verpeut/ vnd das findt man nyndert besser/ dann in den zehen gepoten Gottes.

Frag. Welches sind die zehen gepot?

Antwort. Das erst/ Du solt nicht frembde Götter haben.

Frag. Was sind frembde Götter?

Antwort. Alles darauff man sich verlest/ vnd verhofft dardurch frumm vnd selig zu werden ausserhalb dem eynigen Gott. Es seyen heyligen/ gute werck/ oder andere creatur.

Frag. Was hayst denn/ Du solt nicht frembde Götter haben?

Antwort. Du solt glauben in eynen Got.

Frag. Was ists/ Du solt glauben an eynen Gott?

Antwort. Du solt dein eynige hoffnung vnd vertrauen allein in Got setzen/ ihn von gantzem hertzen lieben/ forchten/ suchen/ vnd vor augen haben/ mangelt dir etwas an leyb oder an seel/ so soltu allein zu jm zuflucht haben/ jn anruffen/ hilff/ trost vnd selickeit bey jm suchen/ dann er spricht selbs/ Ich bin der herr dein got.

Frag. Wie hayst dz ander gepot?

Antwort. Du solt den namen des herrn deyns Gottes nicht vergeblich füren.

Frag. Was hayst/ Du solt den namen des herrn deyns gots nit vergeblich füren?

Antwort. Du solt den namen Gottes nit mißbrauchen/ Nichts wider gottes namen/ wort vnd befelch fürnemen/ leren oder anrichten/ nit vnchristlich vnd ergerlich leben/ aus leychtfertigkeit/ böser gewonheit vnd freuenlich nit schweren/ sonder ein frummes erbars stils leben füren/ Gottes namen in allen nöten anruffen/ den selbigen in glück vnd vnglück bekennen vnd loben/ denn Got wirt den nit vnschuldig halten/ der seinen namen vergeblich füret.

Frag. Welchs ist das drit gepot?

Antwort. Du solt den sabbath oder feyrtag heyiligen.

Frag. Was hayst/ Du solt den feyrtag heyiligen?

Antwort. Du solt von allen fleyschlichen vnd sündlichen wercken feyren vnd ruwen/ nichts von dir selbs anfahen/ sonder Got den herrn in dir lassen wircken/ seinem wort gehorchen/ jm dienen/ das ist der recht geistlich feyrtag des Christen volcks.

Frag. Wie hayst das vierd gepot?

Antwort. Du solt vater vnd mutter ehren/ auff das dirs wolgee vnd lang lebest auff erden.

Frag. Was hayst/ Du solt vater vnd muter ehren?

Antwort. Du solt wissen, das vater vnd muter dir von Got geben sind/ vnd deßhalben jhnen zucht vnd ehre erzaygen/ jnen folgen/ vnterthenig/ willig vnd gehorsam sein/ in liebs vnd guts thun/ wie sie dir gethan haben/ Sie neeren vnd für sie im alter sorgen/ so wirt dir got dein leben fristen.

Frag. Wie hayst das fünfft?

Antwort. Du solt nit todten.

Frag. Was haist du solt nit todten?

Antwort. Du solt nit zurnen noch rach begern/ kein neyd vnd haß tragen/ niemand verachten vnd vbel nachreden/ niemand weder mit rad noch tadt erwurgen/ sonder fridlich vnd freindlich mit yderman sein.

Frag. Wie hayst das sechst?

Antwort. Du solt nit ehebrechen.

Frag. Was haist du solt nit ehebrechen?

Antwort. Du solt kkein schantbar vnzuchtigs wort/ zeychen gebert noch werck vben/ vor aller vnreinigkeit dich enthalten/ keusch in allen dingen sein.

Frag. Wie haist das sibend?

Antwort. Du solt nit stelen.

Frag. Was hayst/ Du solt nit stelen?

Antwort. Du solt niemand das sein nemen/ noch verfortaylen im handel mit falscher maß/ elen/ gewicht/ vnd allen/ damit dein nechster vbernumen mag werden/ dich des deinen benügen lassen/ Got kan dich wol on deines nechsten schaden erneeren.

Frag. Wie hayst das acht?

Antwort. Du solt nicht falsche zeugnus geben.

Frag. Was hayst/ Du solt nicht falsche zeugnus geben?

Antwort. Du solt die lauter warheyte reden/ vnd nicht liegen wider deinen nechsten/ weder vor gericht noch sunst.

Frag. Welches ist das neundt?

Antwort. Du solt dich nicht gelusten lassen deynes nechsten weybs.

Frag. Was hayst/ Du solt dich nicht gelusten lassen deynes nechsten weyß?

Antwort. Du solt nit vnreyne begir vnd lust haben gegen eyns andern weib vnd dir ein eiygen gemahel nemen/ vnd der selbigen dich benügen lassen.

Frag. Wie hayst das zehend gepot?

Antwort. Du solt dich nicht gelusten lassen deines nechsten hauß noch guts.

Frag. Was hayst/ Du solt dich nicht gelusten lassen deynes nechsten hauß noch guts?

Antwort. Du solt nicht geytzig sein/ vnd einem yeglichen günden was jm Got gүнnet/ Ab eyns andern glück nicht verdrieß haben/ deyns glücks dich benügen lassen.

Frag. Mag auch der mensch die gepot Gottes von jm selbs aus aygnem vermügen halten?

Antwort. Der mensch vermag nichts on gottes hilff.

Frag. Wie sol ihm aber der mensch thun?

Antwort. Er mus zuuor frumm vnd ein guter baum werden/ denn der ersten gepurt halben vom Adam her/ sein wir arm sündler/ kinder des zorns/ eyn böser baum/ vnd vermügen aus vns selber nichts dann vnrecht thun.

Frag. Wie wirt man aber frumb?

Antwort. Got macht allein frumb vnd gerecht/ Wenn der mensch dz Euan-
gelion von Christo höret/ vnd glaubt an in/ so macht in derselbig glaub
frumb vnd gerecht.

Frag. Wie gehet das zu?

Antwort. Jesus Christun der warhafftig sun Gottes/ ist allein der biderman
auff erden/ durch den wir frumb werden. Er ist vnser weyßheit/ gerechtick-
eit/ heyligung/ vnd selickeit/ von seiner fülle empfahren wir alle die gerech-
tigkeit. Wer sich auff in verlest mit gantzem hertzen vnd festem glauben der
wirt auch frumd.

Frag. Was haist glauben?

Antwort. Glauben in got hasyt vertrauen vnd mit hertz/ syn vnd mut sich
auff Got verlassen/ seinem wort steuff anhangen vnd daran nit zweyfel all
sein datum vnd zuuersicht auff Got stellen/ Vnd der glaub ist nichts anders
denn ein zuuersicht auff Gottes verhayssung.

Frag. Warauff steet vnd gründt sich der glaub?

Antwort. Er gründt vnd verlest sich allein auff Gottes wort/ vnd on dassel-
big kan der glaub in nöten nicht bestan. Christus Jesus vnd sein wort ist das
fundament vnd der felß/ darauff der glaub steet.

Frag. Kumbt aber der glaub allwegen aus dem gehör an Gottes wort?

Antwort. Der gemeyn ordnung nach/ so kumpt der glaub alleyn aus dem ge-
hör oder Predig des wort Gottes/ wie Paulus Roma. x. meldet/ durch mit-
wirckung der genad Gottes.

Frag. Wie erlanget man aber die genad Gottes?

Antwort. Mit dem emsigen gepet/ durch vnsern herren Jesum Christum,
dann er hat selbs gesagt/ Was jhr den vatter byttet in meynem namen/ das
wirt er euch gewißlich geben.

Frag. wie sol man betten vnd was ist das recht gepett?

Antwort. Ich waiß keyn bessers gepet/ denn das vnser maister vnd seligma-
cher selbs gelernet hat.

Frag. Wye hayste?

Von dem Vater vnser.

Antwort. Vater vnser der du bist im himel/ geheyliget werd dein name/ zukumm dein reich/ dein will geschehe auf erden wie jmm himel. Vnser teglich brodt gib vns heut. Vnd vergib vns vnser schuld als wir vergeben vnsern schuldigern/ vnd für vns nit in versuchung/ Sondererlöse vns vom übel/ denn dein ist das reich vnd die kraft vnd die herrlickeit in ewigkeit Amen.

Frag. Was begert man jmm vater vnser?

Antwort. Das Vater vnser hat siben bitte nacheinander.

Frag. Was ist/ Vater vnser der du bist imm hymel/ ists auch ein gepet?

Antwort. Nein, es ist nur ein lob vnd titel Gotes/ da mit wir bekennen/ dz der almechtig Got vnser vater sey/ vnd wir seine liebe kinder. ER imm himel himelisch jn freud vnd ehren on allen trübsal/ schmerzen/ layd vnd sterblichkeit. Wir auff erden irdisch in laid vnd schmerzen/ mit widerwertigkeit elend vnd jamer vmbgeben/ vnd sterblich.

Frag. Was bitt man denn in dem ersten stuck so man spricht/ Geheyliget werd dein nam.

Antwort. Wir bitten das der nam gottes nit geschendet vnd gelestert werde durch falsch leer vnd predig oder durch vnser sündlichs böses leben sonder das wir heilig werden/ vnd ein frummes christlichs leben füren/ seinen namen loben vnd preisen in all vnserm thun vnd lassen.

Frag. Was bitt man in dem andern stuck/ so man spricht/ zukumm dein reich?

Antwort. Wir begern dz vns got seinen geist geb/ vnd setz vns auß dem reich der finsternuß/ in das reich des liechts/ sein heyligs wort offenbar/ vnd ein rechten festen bestendigen glauben in in/ dz er vns regir vnd bey vns wone vnd nymmer verlasse.

Frag. Was begert man im dritten/ so man bettet/ Deyn will geschehe etc.

Antwort. Weyl das fleysch ymmer das sein sucht/ vnd strebt wider Gott/ so bitten wir/ das Got mit vns mache nach seinem wolgefallen/ vnd das wir seynen willen thun hie auff erden/ wie alle Engel im hymel seinen Götlichen willen erfüllen/ vnd das wir nicht erfunden werden vngehorsame kinder/ die seinem wort vnd willen widerstreben.

Frag. Was ist denn das für ein bitte/ so wir sprechen/ Gib vns vnser teglich brod?

Antwort. Wir bitten vmb zeytliche narung/ wie wir zuuor vmb geystliche güter/ vmb sein namen/ reych vnd willen gepeten haben/ also bitten wir hie vmb alle leybliche notdürfft/ das vns Got vnser vatter versorgen wöl mit vnser teglichen narung/ essen vnd trincken/ klayder/ vnd wes wir bedürffen. Wir bitten auch für vnser überkeit/ das wir im frid vnser brodt geniessen.

Frag. Was hayst dann das fünfft/ Vergib vns vnser schuldt?

Antwort. Wir bitten/ das Gott vnser vater vns alle vnser sünd/ missethat vnd vbertrettung wöl vergeben/ denn wir in sünden empfangen vnd geporn/ für vnd für Gottes zorn mit vnserm sündlichen leben verdienen/ das er solche nit straff nach seiner strenge/ sonder aus barmhertzigkeit nachlasse/ schenck vnd verzeihe. Wie wir auch mit willen vnserm nechsten nachlassen/ vergeben/ vnd schencken alles warmit sie vns belaydiget haben.

Frag. Was bettet man im sechsten/ so man spricht/ Für vns nicht in versuchung.

Antwort. Wir bitten das Got dem Teuffel nit gewalt vber vns gebe/ das er vns in versuchung/ yrthumb/ vnglauben/ verzweyflung füren vnd darynn versincken laß/ sonder gnediglich vns beystehe vnd halt/ das wir im glauben verharren biß in das endt.

Frag. Was ist denn das sibendt für ein bitte/ ERLöse vns von allem vbel?

Antwort. Wir bitten/ das vns got vnser vater barmhertziglich wöl erledigen von allem schaden vnd vnglück/ geystlich vnd zeytlich/ fürnemlich vor dem bösen laydigen Teuffel/ der vns tag vnd nacht nachstelt/ vnd ein bößwicht ist/ja ein brunn alles bösen vnd vbels.

Frag. Was ist dann der zusatz/ Wenn deyn ist das reych vnd die krafft vnd die herligkeit in ewigkeyt?

Antwort. Es ist ein kurtze summ vnd begryff des gantzen gepets. Dein ist das reych/ heyßt/ Du bist der recht herr/ könig vnd kayser/ vnd wir sein dein volck/ vnter deinem scepter vnd gewalt. Darnach dein ist die krafft/ hayst/ Du bist gewaltig vnd mechtig/ vermagst vns zu helffen/ schützen vnd schiermen/ vnd geben deinen kindern/ warumb sie dich bitten. Aber dein ist die herligkeyt/ ist als vil gesagt/ Du bist allain der herr/ vnd seyn dir hymel

vnd erden vnterworffen/ dir gehört allain das lob vnd preiß von nun an bis in ewigkeit. Amen hayst/ das geschehe oder werde war.

Von dem Gesetz vnd Euangelio

Frag. Was ist das Gesetz?

Antwort. Es ist Gottes gepot darynn der Herr vns das böß verpeut/ vnd fordert guts von vns/ oder ist ein göttlicher spiegel vns sündern gegeben/ das wir vns darynnen besehen vnd erkennen/ was wir für leute seyen/ vnd was wir für mangel haben.

Frag. Macht auch das gesetz frumb und selig.

Antwort. Als wenig der spiegel den menschen schön vnd rayn macht/ also wenig macht auch das gesetz frumb vnd selig. Denn es erfordert wol die gerechtigkeit von vns/ aber es gibt vnd raycht nicht das vermügen.

Frag. Warumb hat denn Got das gesetz oder gepot geben/ so es nicht gerecht macht.

Antwort. Das es vns anzeyge vnsere schwachheit/ zenichtigkeit/ sünd/ laster vnd vermaledeyung/ das wir vns selbs wol erkennen/ wie nichts guts in vns sey/ vnd wir on alle gerechtigkeit vnd frümbkeit gantz entwichet sein. Denn weren wir zuur frumb/ so dürfft vns Got nicht hayssen frumb sein.

Frag. Was hilfft denn die erkantnus des gesetzes vnd der sünden? macht sie mich frumb vnd rayn von sünden?

Antwort. Nein, sie reynigt auch nicht/ gibt aber vrsach/ das ich zu Christo dem Herren schrey vnd lauff vmb hilff/ das er mich auch frumb vnd gerecht mache. Der spiegel wescht vnd reynigt keinem das vnsauber angesicht/ aber er gibt einem vrsach/ das er reynigung beym wasser oder anderß wo suche. Also dringt mich das gesetz vnd erkantnus meiner sünd auff Christum/ als zu dem artzt vnd brunnen alles hayls vnd gerechtigkeit/ der nimpt die sünd hinweck/ vnd nicht das gesetz oder meine werck. Dann Christus ist vns gemacht von Gott zur weyßheit vnd zur gerechtigkeit/ vnd zur heyligung/ vnd zur erlösung. Dz gesetz ist vnsere zuchtmaister auf Christum.

Frag. Hat aber das gesetz sunst kein ampt?

Antwort. Ja es drewet vns den fluch vnd den todt/ weret der hand/ vnd helt

vns bey burgerlicher zucht vnd fridt/ das wir niemand beschedigen aus forcht der straff vnd peyn.

Frag. Was ist dann das Euangelium?

Antwort. Es ist eine krafft Gottes die da selig macht/ alle die daran glauben. Es verheißt vns eyn gnedigen Got/ verkündt vns vergebung der sündt/ vnd das ewig leben in Christo dem herren.

Frag. Macht aber das Euangelium frumb vnd selig?

Antwort. Ja es verspricht vns alle güter Gottes. Das Christus vnser aygen sey/ für vnser sünd gestorben/ vnd vmb vnser gerechtigkeit willen widerumb erstanden. Haben wir Christum/ so haben wir vergebung der sünd/ gerechtickeit vnd ewigen segen.

Frag. Wie wirt gottes gerechtigkeit vnser?

Antwort. Durch das Euangelium vnd die Sacrament des Tauffs vnd leybs vnd bluts Christi/ denn in disen wirts vns angepoten vnd mittalyt so wir anders glauben.

Von dem Tauff.

Frag. Was ist der Tauff?

Antwort. Er ist ein bad der widergepurt vnd ein eintauchung inß wasser von Christo eingesetzt?

Frag. Warzu ist sie nutz?

Antwort. Das wir wissen/ das wir Christo eingeleybt vnd eyngepflantz sein/ vnd haben vergebung der sünden. Das Got vnser gütiger vater sein wöl/ vnd wir sein liebe kinder.

Frag. Woraus waystu das?

Antwort. Aus dem wort des Herren/ der spricht/ Geet hin lernet alle völker/ vnd tauffet sie in dem namen des vaters/ vnd des sons/ vnd des heyligen geysts. Wer glaubt vnd getaufft wirt/ der wirt selig. In disen worten sihe ich/ das mir der tauff von nöten vnd nützlich ist/ von wegen Gottes einsetzung/ wort vnd zusagen.

Frag. Was gehört zu eyner rechten tauff?

Antwort. Erstlich gehört des Herren wort darzu da er die tauff eingesetzt/

das ich wayß/ das die tauff jm wol gefelt/ vnd er sie selbs bestetiget hat.

Frag. Was gehört mer darzu?

Antwort. Auff das wort der einsetzung vnd verhayssung Gottes/ gehört ein fester vnwanckelmütiger gelaub vnd vertrawung/ das ich die verheyssung ins hertz fasse/ vnd mich darauff verlasse.

Frag. Gehört zu der verheyssung vnd glauben nichts mehr?

Antwort. Darnach so empfahe ich den tauff des wassers/ als ein Sigil der gerechtigkeit/ nach seinem beuelch/ im glauben vnd vertrawen/ vnd zweyfel nicht/ Got gebe mir was er versprochen hat.

Frag. So höre ich/ das drey ding zum tauff gehören/ nemlich das wort Gottes/ der glaub vnd das eusserlich empfahe oder zaychen.

Antwort. Zu einem yeglichen sacrament gehören dise drey stuck/ Am ersten/ Gottes eynsetzung/ wort oder verheyssen/ Darauff gehört das eusserlich werck oder zeychen Vnd zum dritten/ der glaub der fasset das wort und das werck zusammen.

Frag. Ist auch der tauff nützlich on die zwey wort vnd glauben?

Antwort. Nein/ Es heyst auch kein tauff/ es hab denn die drey stuck beyeinander/ vnd mag keyns von dem andern geschayden sein. Sacrament on wort vnd glauben / sein kein nütz/ vnd das ist ein rechter tauff/ wo wort/ glauben/ vnd wasser zusammen werden verfaßt/ wie sie Christus zusammen setzt.

Frag. Wem sol man den Tauff mittaylen?

Antwort. Allen die in Gottes reych gehören/ denn ein diener Gottes kan jn niemand mit fueg vnd recht abschlahen/ dann allein denen/ die öffentlich mit der that dem wort Gottes widerstreben.

Frag. Mag man auch die kinder tauffen/ die weyl sie weder vernunfft noch glauben haben?

Antwort. Die kinder gehören gleych als wol vnter das volck gottes als die alten/ Yhnen ist das reych der hymel als wol verhayssen/ als den alten/ so kan jhn Got als wol den glauben geben/ als den alten. Dieweyl der glaub ein gabe gots ist/ darumb so kan man jn den tauff mit keinem rehct abschlahen.

Frag. Woraus waystu das?

Antwort. Christus schleußt die kinder nicht aus vom hymelreich/ sonder heyßt sie zu jm bringen. Darumb künden wir jn den tauff auch nicht weren. Vnd im gesetz must man die kinder beschneiden. Dieweil nun die tauff an der beschneydung stat kumen ist/ wie aus Paulo/ Coloß. ii. erlernet wirt/ so gehört die tauff den kindern als wol zu/ als den alten. Gehören sie vnter die verheysung Gottes/ so sol man jhnen auch das eusserlich werck nicht abschlahen.

Frag. Was ists dann von nöten/ das mans mit teutscher sprach thu?

Antwort. Es geschicht darumb/ das die geuattern vnd andere zuhörer künden versteen den treffenlichen handel vnd wercke Gottes/ vnd also mit dem priester Got den vater ernstlich anruffen/ flehen/ vnd bitten dem kind vmb ein warhafftigen beständigen glauben/ das Got beseligen vnd begnaden wöl mit seinem götlichen geyst/ das ein frummer Christ aus ihm werden müg.

Frag. Künd solchs gepet nicht auch geschehen wenn man gleich lateinisch tauffet?

Antwort. Paulus will/ das man in der gemeyn Gottes mit gemeyner sprach handel/ das yederman verstehe. So nützet vnd dienet Teutsche sprach vns teutschen vil mehr/ denn eyn andere frembde sprach/ die wir nicht versteen. So ist noch ein andere vrsach auch verhanden.

Frag. Was ist die selbig vrsach.

Antwort. Das die andern Christen ihres tauffs erynnert werden/ vnd gedencken Gottes bund vnd zusagen/ vnd was sie Got jhrem herren im tauff gelobt haben. Das sie dem teuffel vnd seinem wesen widersagt haben/ vnd der sündt nicht mehr wöllen dienen sonder der gerechtigkeit/ Solchen bund vnd gelübd sollen sie Got halten, vnd stetig der sünd/ welt/ todt/ teufel/ hell widerstandt thun/ dem fleysch sein zaum vnd mutwillen nit zulang lassen/ sonder vnter Gottes gehörsam füren. Vnd weyl man das Euangelion mit teutscher sprach predigt/ ists billich/ das man auch die Sacrament in der selbigen sprach außtayle vnd handel/ denn es gehört das Euangelium zu den sacramenten.

Frag. Was haystu die sacrament?

Antwort. Dem gemeynen brauch nach hayssen wir Christen Sacrament ein zeychen oder sigil götlicher verhayssung/ bey dem vns vergebung der sünd

vnd Gottes genad versprochen ist. Als der tauff ein Sacrament ist/ darumb/
das Christus vergebung der sünden bey solchem eusserlichen werck zusagt/
so mans im glauben empfehet.

Von dem Sacrament des leybs vnd bluts Christi.

Wiewol wir nicht leren/ das die kinder zum Sacrament sollen gehen/ biß sie
sich selbs probieren künden/ vnd den leyb des herrn vnterschayden nach der
leer Pauli .i. Corinth. xi. so wöllen wir dennocht von dem sacrament ein we-
nig setzen/ der eynfeltigen Priester vnd layen halben/ das sie auch ein vnter-
richt haben.

Frag. Was ist denn das Sacrament des leybs vnd bluts ChristiEs ist ein hayl-
sames abentmal/ darzu vns arme sündler Christus berufft vnd ledt/ vnd gib
vns sein leyb vnd blut zu essen vnd trincken.

Frag. Wer gehört zum abentmal Christi?

Antwort. Alle die zum Euangelio gehören/ denn im Euangelio wirt verkündt
vergebung der sünd in gemeyn/ Aber im sacrament empfehet ein yeglicher
Christ für sich selbs/ denn so ich empfahe den leyb vnd blut Christi/ beken-
ne ich darmit/ das ich dero einer bin/ für den Christus am creutz gestorben
sey/ das sein gerechtickeit mein sey/ vnd ich der erben einer/ den er sein
heyligs ewigs testament beschayden hat.

Frag. Welches sind hie die beschaydne güter oder das testament?

Antwort. Er hat allen glaubigen verhayssen vergebung der sünd/ vnd das
ewige leben/ des zu einem sigel vnd ware bestetigung/ gibt er seinen leyb
zur speyß/ sein blut zu eynem tranck/ wie dann sein eygene wort im abent-
mal außweysen.

Frag. Wie lauten seine wort?

Antwort. Vnser Herr Jhesus Christ/ in der nacht/ da er verrhaten wardt/ na-
me er das brodt/ dancket/ vnd brachs/ vnd gabs seynen jungern/ vnd sprach/
Nemet/ esset/ das ist mein leyb der für euch geben wirt solchs thut/ so offt
jhrs thut zu meinem gedechtnus.

Desselben gleychen auch den kelch nach dem abentmal/ vnd sprach/ Nemet
hin vnd trinckt all daraus/ das ist der kelch ein new testament/ mit meynem

blut/ das für euch vergossen wirt zur vergebung der sünden/ solchs thut/ so oft ihrs trinckt/ zu meinem gedechtnuß. Hie hören wir/ das er seinen leyb im brodt darreicht zu essen/ vnd sein blut im kelch gibt zu trincken.

Frag. Was sol man mehr thun bey disem abentmal?

Antwort. Man sol den leib Christi essen/ vnd das blut trincken zu seiner gedechtnus.

Frag. Was ist denn sein gedechtnus?

Antwort. Paulus sagts zun Corinthiern/ so oft jhr von disem brodt esset/ vnd von disem kelch trinckt/ solt jhr des herrn todt verkündigen/ biß das er kumpt. Die gedechtnus ist/ das wir zu erst die grösse vnser sünd vnd misethat erkennen/ die keyn mensch hat können versönnen/ wir waren all verflucht/ dz Gottes sun selbs für vns must leyden/ vnd von dem fluch vns erretten/ die schuld bezalen/ Darnach sollen wir gedencken der vnaußspechlichen güter/ die wir durch Christum haben empfangen/ die sollen wir predigen/ preysen vnd verkünden/ das Got alle zeyt die ehre hab/ von nun an biß in ewigkeit.

Frag. Was gehört mehr dazu?

Antwort. Glaub vnd lieb/ Das ich durch den glauben auff Got vnd sein wort sehe/ vnd mit der liebe dem nechsten diene/ helff/ rathe vnd verzeyhe/ wie mir Got geholffen vnd verziehen hat.

Frag. Glaubstu auch das Christus leyb vnd blut im abentmal geessen vnd getruncken werde?

Antwort. Ich glaub warhafftig/ das das brodt sey der leyb Christi/ vnd der kelch das blut Christi nach der eynsetzung vnd den Worten des herren/ die er selbs redt/ Nemt vnd esset/ das ist mein leyb/ der für euch geben wirt. Nemet vnd trincket alle daraus/ das ist mein blut das für euch vergossen wirt zur vergebung der sünd. Meine oder eines andern menschen wort vermögens nit/ das Christus leib vnd blut im abent des herrn verhanden sein/ sondern sein wort vnd befeh.

Frag. Sol man aber dz sacrament in einer oder zwayer gestalt empfangen?

Antwort. Menschen testamen helt man fest vnd vnuerruckt/ vil billicher sol man des herrn Jesu Christi testament lassen geen wie ers beschayden hat. Er hat bayde gestalt befolhen/ darumb sol man bayde empfangen/ oder gar müs-

sig steen. Gottes wort sol beleyben vnd von keinem menschen verendert werden.

Frag. Was sol man nach dem abentmal thun?

Antwort. Man sol Got danckbar sein/ vnd sich vor sünden hütten/ dem nechsten dienen durch die lieb/ vnd also mit der that beweysen/ das wir Christen vnd derben des ewigen lebens seyen. Das verleyhe vns Gott/ Amen.

Die gmeynen gepet/ die man pflegt Collec- ten zu nennen.

Lieben frewnd/ Christus vnser lieber herr/ auff das alle glaubigen zu bitten geraytzt wurden/ hat er gar ein tröstliche versicherung dem gepet angehenckt/ sprechend/ Suchet/ so werdt jhr finden/ Klopfet an/ so wirt euch auffgethan/ Vnd wo zwen oder drey versamlet sind in meinem namen/ was sie bitten meinen hymlichen vater in meinem namen/ das sol jnen widerfaren von meinem vater im hymel. Dieweyl wir dann ein solche genedige vnd warhafftige zusagung Christi haben/ vnd seiner vnterweysung vnd befeh nach (wie das vater vnser außweyst) schuldig sind für ein ander zu bitten. Darzu auch durch den heyligen S. Pauls zu solcher fürbit hoch vermanet werden/ vnd mancherley anligender not vnd vrsach vorhanden sind/ die vns billich zu bitten bewegen/ So verman ich euch jhr geliebten Christen vnser herren/ haltent an am gepet on vnterloß/ Vnd sonderlich die weil wir yetzund versamlet sind in dem namen des herrn. So last vns zum ersten hertzlich bitten für die gemeyn Christlichen kirchen/ für die kirchen diener/ für die verkünder des worts Gottes/ das sie vnser Got wöl beschützen wider alle anlauff vnd versuchung des bösen feyndts/ damit sie auff dem starcken felsen/ vnsern herrn Christo Jesu bestendigklich beleyben.

Bittend mit mir also.

Almechtiger gütiger Gott/ vnd vatter vnser herren Jesu Christi/ der du vns ernstlich befolhen hast/ das wir dich bitten sollen/ für arbaytter in die erndte/ das ist/ für rayne prediger deynes worts. Wir bitten dein grundlose barmhertzigkeit/ du wöllest vns rechtgeschaffen lerer vnd diener deines götlichen worts zu schicken/ vnd den selben dein haylsames wort in den mund geben/

vnd in das hertze/ das sie deynen beuelch getrewlich außrichten/ vnd nichts predigen das seinem heyligen wort entgegen sey/ auff das wir durch dein hymelisch ewigs wort/ ermanet/ gelert/ gespeyßt/ vnd getröst werden. Thun was dir gefellig/ vnd vns fruchtbarlich ist/ Gib herr deyner gemayn deynen geyst/ vnd götliche weyßheit/ das deyn wort vnter vns lauffe vnd wachse/ das sie die diener/ deyn wort mit aller fraydigkeyt/ wie sichs gepürt/ reden/ vnd deyn heylige Christliche gemayn/ gebessert werde/ vnd mit beständigem glauben dir diene/ vnd in bekandtnus deynes namens bestande/ durch Jesum Christum vnsern herren/ Amen.

Für die Obrickeyt.

Laßt vns trewlich bitten aus dem befelch vnsern herren Jesu Christi vnd seiner Apostel/ für alle weltliche Obrickeyt/ auff das wir ein ruwiges/ stils leben füren mügen/ in aller gotseligkeyt vnd erbarckeyt/ dann solchs ist gut/ darzu auch angeneh vor Got vnserm herrn/ welcher wil/ das alle menschen genesen/ vnd zur erkantnus der warheit kumen.

Bittend mit mir also.

Barmhertziger hymlischer vater/ in welches hande aller menschen gewalt vnd öbrigkeit bestehet/ von dir gesetzt zur straff der vbeltheter/ vnd wolfart der bider leute/ In welches hand auch steen alle recht/ vnd gesatz aller reych/ Wir bitten dich/ sihe gnedigklich auff vnseirn gnedigsten herrn den Kayser/ vnd alle Fürsten vnd Herren/ fürnemlich auff vnsern gnedigen herren Marggrafen Georgen/ auff die gantzen herschafft zu Brandenburg/ auff alle ordenlich öbrigkeit/ damit sie dz weltlich schwert jhnen von dir befolhen/ im glauben vnd forcht Gottes/ nach deinem befelch/ füren mügen/ Vmbschatte sie mit der krafft des allerhöchsten/ erleuchte vnd erhalt sie bey deynem götlichen namen. Gib jhnen lieber herr weyßheit vnd verstand vnd ein fridlich regiment/ auff das sie alle jhre vnterthanen in der warheit vnd gerechtigkeit/ die dir herr gefellig ist/ regieren vnd beschiermen/ Er lenger jhnen/ o Got vnsern hayls/ jhre tag/ auff das dein götlicher nam durch sie geheyligt vnd gepreyßt werde/ von nun an biß in ewigkeit. Darzu helff jn Got vnser vater durch Jesum Christum vnsern herren/ Amen.

Für eynen gemeynen fride.

Last vns auch gar ernstlich bitten/ vmb einen gemeynen landtsfridt/ auff das der rechte go0ttes dienst vnter vns auffwachse/ vnd Christliche zucht zuneme/ dann wo krieg vnd vneynigkeit ist do geet der rechte gottes dienst zu grunde/ vnd fleußt ein vnglück aus dem andern.

Also bittend.

Almechtiger ewiger Got/ ein könig der ehren/ vnd ein herr hymels vnd der erden/ durch welches geyst alle ding regiert/ durch welches versehung alle ding geordnet werden/ der du bist eyn Gott des frids/ von dem allein alle eynickeit zu vns kumpt/ Wir bitten dich durch vnsern herrn Jhesum Christum/ du wöllest vns vnser sünd vergeben/ vnd mit deynem götlichen frid vnd eynigkeit begnaden/ damit wir in forcht vnd zittern dir dienen zu lob vnd preyß deynes namens/ Amen.

Für alle vnser Sünde.

Laßt vns auch bitten für vnser sünde vnd vbertrettung/ damit wir Got belaydigt haben/ das er nicht wöl acht haben auff vnser missethat/ vnd nit mit vns in das gericht treten/ sonder gedenck seiner barmhertzigkeit/ vnd der verheyssung/ do er spricht/ Ich hab keynen lust ob des gottlosen todt/ sonder das ist mein lust/ das er sich von seinem wesen kere/ vnd lebe.

Also bittend mit mir.

Barmhertziger Gott vnd hymlicher vater/ des barmhertzigkeit keyn ende ist/ der du langmütig/ genedig/ vnd von grosser genad vnd trew bist/ vnd vergibst missethat/ vbertrettung/ vnd sünd. Wir haben layder gesündigt mit vnsern vettern/ wir haben miißhandelt/ vnd sind gottloß gewesen/ vnd dich oft erzürnet/ dir allain haben wir gesündigt/ vnd vbel vor dir gethan/ Aber herr gedenck nicht an vnser vorige missethat/ laß bald dein barmhertzigkeit vber vns grösser sein/ dann wir sind fast ellend worden/ hilff vns Gott vnser hayls/ vmb deines namens ehre willen/ Errette vns/ vnd vergib vns vnser sünd vmb deynes namens willen/ vnd von wegen deynes lieben sons Jesu Christi vnser haylandts/ Amen.

Für die frucht der erden.

Lassend vns auch bitten für die frucht der erden/ das sie Got wölle gesegen vnd behütten/ vnd vns wol geraten lassen/ vnd götlich geniessen.

Bittend also.

O Herre almechtiger vater/ der du durch dein ewigs/ göttlichs wort alle ding erschaffen hast/ gesegnest vnd erhelst. Wir bitten dich/ das du dein wort vnsern herrn Jesum Christum vns wollest offenbaren/ vnd in vnser hertz pflanzen/ dardurch an vns gesegnet werd/ mit fruchtbarer wachung/ vnd göttlichem gebrauch vnd gedeyen/ vnser ecker vnser schewer/ vnd alles was zur leyblichen notdürfft dienet/ durch Christum vnsern herrn/ Amen.

Für die feyndt.

Lasset vns auch bitten für vnser feyndt/ das Got sie füre in jhr eygne erkantnus/ vnd von jhrem vnrecht abfüre.

Also bittend mit mir.

Almechtiger ewiger got/ der du vns befolhen hast durch deinen lieben son/ vnsern herrn Jesum Christum/ das wir vnser feyndt lieb haben sollen/ denen/ so vns belaydigen/ guts thun/ vnd für vnser verfolger bitten/ Wir schreyen ernstlich zu dir/ das du alle vnser feind wöllest gnediglich haymsuchen/ ware rew jhrer sünd verleyhen/ vnd ihnen mit vns vnd der gantzen Christenheit/ eyn freundtlichs/ gotforchtigs/ eynhelligs gemüt vnd hertz geben/ durch vnsern herrn Jesum Christum/ Amen.

Für die irrigen im glauben.

Darneben/ weyl es yetzund die not hoch erfordert/ so lasset vns auch getrewlich bitten/ für alle bekümete hertzen vnd verwirte gewissen/ vnd für die so mit falscher irriger lere behafft sein/ auch für die/ so dem wort Gottes entgegen sind/ vnd mit rath vnd that verfolgen/ das sich Got jr erbarm/ vnd bringe zu warer erkantnus der sünde vnd seiner göttlichen gnad/ Amen.

Laß vns also bitten.

Barmhertziger/ gütiger Gott vnd vater/ wir bitten dich ernstlich vnd mit gantzem hertzen/ du wöllest alle die jhenigen/ so von Christlichem glauben

abgewichen/ oder usnst mit etlichen stucken irrendt/ vnd mit falscher schedlicher lere behafft oder vergifft sind/ veterlich haymsuchen/ vnd wider bringen zu erkantnus jhres irrthumb/ das sie ein lust vnd gefallen gewynnen ab deyner bestendigen/ eynfeltigen/ ewigen warhayt/ vmb Jesus Christus leyden vnd sterben willen/ Amen.

Für anfechtung.

Lassend vns auch bitten Got vnsern herren/ das er die welt vom irrthumb erlösen wöl/ vnd auch von kranckheyten/ theuerungen/ gefencknussen/ sterben/ vnd aller widerwertigkeit/ die durch den bösen geyst vnd schedlichen feynd/ zu verderbnus seel vnd leyb/ vns werden zugefügt.

Also bittend.

Almechtiger ewiger Got/ ein trost der trawrigen/ ein sterck der schwachen laß für deyn angesicht durch vnsern herren Jesum Christum kumen/ die bit aller deren/ so in bekümmernus vnd anfechtung zu dir seufftzen vnd schreyen/ das menigklich mercke vnd empfind/ deyn hilff vnd beystand in der zeyt der not/ Amen.

Für alle schwangere frawen.

Lassend vns bitten Got vnsern herren für alle schwangere frawen/ das er jhnen wol geben sterck vnd hayl/ domit sie gnedigklich von kindsbanden erlöset werden.

Also bittend.

Almechtiger ewiger Got vater/ ein schöpfer aller ding/ der du genedigklich gesegnet hast man vnd weyb/ vnd gesagt/ Seyd fruchtbar vnd mehret euch/ auch hastu dem weyb in kummer zu geperen zu eynem heyligen creutze gemacht/ durch deynen son vnsern herren/ der vns von dem fluch vnd sünden erlöset hat. Wir bitten dich gütiger vater/ herre vnd Got/ wöllest die frucht ihres leybs/ dein aygen werck erhalten vnd bewaren/ vnd vnder dem creutz in der bekümmerlichen gepurt nicht verderben lassen/ sonder gnedigklich vnd mit frid entpinden/ durch Christum Jesum vnsern herren/ Amen.

Eyn gemeyn gepet für alle

menschen es sey öbrigkeit/ prediger oder andere/ auch verfolger des Euan-
gelij betreffend etc.

Also Bettend.

Almechtiger ewiger Gott/ der du wilt/ das alle menschen genesen vnd zu er-
kandnus deiner götlichen warheit kumen/ Wir bitten dein göttliche maiestet/
durch Jesum Christ dein eynigen son vnsern herrn vnd hayland/ du wöllest
dein göttliche genad/ geyst/ vnd hilff mittaylen aller ordenlicher öbrigkeit/
das sie fridlich vnd wol regieren allen Christenlichen dienern deines heyli-
gen worts/ das sie recht vnd fruchtbarlich leren/ vnd wöllest durch deinen
almechtigen gewalt vnd vnerforschliche weißheyte/ widerstand thun allen
denen/ die dein heilig wort hassen/ vnd mit falscher leer vnd vnordenlichen
gewalt verfolgen/ sie erleuchten/ vnd zu erkandtnus deiner herligkeit füren/
auff das wir alle in eym stillen/ geruwigen/ vnstreflichem leben/ die reych-
tumb deiner götlichen genad/ durch ein raynen glauben erlernen/ vnd dir
eynigem waren Got vnd herrn aller herrn/ mit volkumen hertzen/ in heylig-
keit vnd gerechtigkeit/ die dir gefellig ist/ mögen dienen/ durch vnsern
herrn Jesum Christ deinen son/ der mit dir in eynigkeit des heyiligen geysts
lebt vnd herrscht/ ein eyniger warer Got ymmer vnd ewigklich Amen.

Eyn andere Collect.

Almechtige Got/ der du bist ein beschützer aller die auff dich hoffen/ on
welches genad niemandt nichts vermag/ noch etwas vor dir gilt/ laß deyn
barmhertzigkeit vns reychlich widerfaren/ auff das wir durch dein heyliges
eingeben/ gedencken was recht vnd gut ist/ vnd durch deyn krafft auch das-
selbige volbringen/ vmb Jesus Christus vnsern herrn willen/ der mit dir her-
schet vnd lebt in ewigkeit/ Amen.

Catechismus, Das ist Vnterricht zum Christlichen Glauben wie man die ju-
gent leren vnd ziehen sol, in frag weyß vnd antwort gestellt. Item, Etliche
Christliche Collecten oder gebet für gemeynes anligen der Christenheyte.
Nuremberg 1528.

Quellen:

Sämtliche Texte sind der [Glaubensstimme](#) entnommen. Hier sind zumeist auch die Quellangaben zu finden.

Die Bücher der Glaubensstimme werden kostenlos herausgegeben und dürfen kostenlos weitergegeben werden.

Diese Bücher sind nicht für den Verkauf, sondern für die kostenlose Weitergabe gedacht. Es kommt jedoch immer wieder zu Fragen, ob und wie man die Arbeit der Glaubensstimme finanziell unterstützen kann. Glücklicherweise bin ich in der Situation, dass ich durch meine Arbeit finanziell unabhängig bin. Daher bitte ich darum, Spenden an die **Deutsche Missionsgesellschaft** zu senden. Wenn Ihr mir noch einen persönlichen Gefallen tun wollt, schreibt als Verwendungszweck „Arbeit Gerald Haupt“ dabei – Gerald ist ein Schulkamerad von mir gewesen und arbeitet als Missionar in Spanien.

Spendenkonto: **IBAN:** DE02 6729 2200 0000 2692 04,
BIC: GENODE61WIE

Alternativ bitte ich darum, **die Arbeit der Landeskirchlichen Gemeinschaft Schlossplatz 9 in Schwetzingen zu unterstützen.** Die Landeskirchliche Gemeinschaft „Schlossplatz 9 in Schwetzingen ist eine evangelische Gemeinde und gehört zum Südwestdeutschen Gemeinschaftsverband e. V. (SGV) mit Sitz in Neustadt/Weinstraße. Der SGV ist ein freies Werk innerhalb der Evangelischen Landeskirche. Ich gehöre dieser Gemeinschaft nicht selber an, und es gibt auch keinen Zusammenhang zwischen der Gemeinde und der Glaubensstimme, doch weiß ich mich ihr im selben Glauben verbunden.

LANDESKIRCHLICHE GEMEINSCHAFT „SCHLOSSPLATZ 9“ 68723
SCHWETZINGEN

Gemeinschaftspastor: M. Störmer, Mannheimer Str. 76,
68723 Schwetzingen,

IBAN: DE62 5206 0410 0007 0022 89
Evangelische Bank eG, Kassel

Andreas Janssen
Im Kreuzgewann 4
69181 Leimen

Natürlich suche ich immer noch Leute, die Zeit und Lust haben, mitzuarbeiten - wer also Interesse hat, melde sich bitte. Meine Email-Adresse ist: webmaster@glaubensstimme.de. Insbesondere suche ich Leute, die Texte abschreiben möchten, bestehende Texte korrigieren oder sprachlich überarbeiten möchten oder die Programmierkenntnisse haben und das Design der Glaubensstimme verschönern können.

Inhaltsverzeichnis

Vorwort	1
Katechismus	2
Von den Artickeln des Christlichen Glaubens.	2
Von den zehen Gepoten	5
Von dem Vater vnser.	9
Von dem Gesetz vnd Euangelio	11
Von dem Tauff.	12
Von dem Sacrament des leybs vnd bluts Christi.	15
Die gmeynen gepet/ die man pflegt Collecten zu nennen.	17
Für die Obrickeyt.	18
Für eynen gemeynen fride.	18
Für alle vnser Sünde.	19
Für die frücht der erden.	19
Für die feyndt.	20
Für die irrigen im glauben.	20
Für anfechtung.	21
Für alle schwangere frawen.	21
Eyn gemeyn gepet für alle	22
Eyn andere Collect.	22
Quellen:	23